

Protocol no. 80
Sezzüda da gövgia, als 31 october 2013, 20.00 – 22.45

Preschaints: Albert Mayer, Andri Poo, Dumeng Jann,
Marianne Werro-Lehmann e Marco Fallet (protocol)

S-chüsà: Men Caviezel.

Protocol

Il protocol no. 79 da la sezzüda da mardi, als, 22 ocober 2013 vain approvà.

711 021 FABRICA
Georg Lutz; duos fouras geotermicas pro la chasa d'abitar a Stron

Il permiss davart l'uffizi per la natüra e l'ambiant ais avantman. La cumischiun da fabrica ha trattà la dumonda in sen positiv. Il cussagl conced'ìl permiss per las duos ulteriuras fouras geotermicas.

712 021 FABRICA
Società in condomini Vidos; allontanamaint d'üna pütta pro la sortida da la garascha

La cumischiun da fabrica ha trattà la dumonda in sen positiv. Sco proceder d'annunzcha e sün proposta da la cumischiun conced'ìl cussagl il permiss da fabrica.

713 021 FABRICA
Domenic Augustin; portas da garascha chasa a Plaz

Il manader tecnic e l'actuar han redigi üna charta, in incumbensa da la cumischiun da fabrica, da la quala vain dat prelecziun. Quella cumpigl'üna resümaziun da tuottas posiziuns dal partun da fabrica fin da qua sco eir quella da la chüra da monumaints. Il cussagl va d'accord cun quella ed uschè vain quella protramiss al patrun da fabrica.

714 021 FABRICA
Curdin Horber; dischlocaziun da la remissa a Varclaina

Il patrun da fabrica vaiva reconstrui, cun sbodamaint sainza permiss, sia remissa a Funtana da Curtin. Per quel intent nu d'eira gnüda fatta ingüna dumonda per fabricats dadour la zona BAB a l'istanza chantunala. Sün proposta da quell'inoltrescha uossa il patrun da fabrica la dumonda per pudair dischlocar la remissa sper sia stall'existententa.

La documaint'ais avantman in möd cumplet. La cumischiun ha trattà la fatschenda e sün proposta da quella decid'ìl cussagl d'inoltrar la dumonda in sen positiv a l'uffizi chantunal pel proceder dal BAB.

715 021 FABRICA
Fam. Kreienbühl - Fretz; müdamaint da proget

La cumischiun da fabrica ha examinà la dumonda per diversas müdaziuns plü pitschnas dal proget acconsenti. La fatschend'ais statta publichada ed i nu sun entradas ingünas protestas. Sün proposta da la cumischiun da fabrica vain concess il permiss da fabrica.

716 021 FABRICA
Fam. Bodnar – Jenny; dumonda da prolungaziun dal permiss da fabrica; chasa d'abitar Plazzetta

Il permiss da fabrica d'eira fingià gnü prolungà fin süls 31 december 2013. Uossa dumond'il patrun da fabrica per ün'ulteriura prolungaziun. La cumischiun ha trattà la fatschenda e propuona da na entrar sülla dumonda, quai our dal motiv chi's tratta qua d'ün fabricat da seguondas abitaziuns.

717 021 FABRICA
Not Janett; dumonda da prolungaziun dal permiss da fabrica; chasa d'abitar Chasellas

Il patrun da fabrica vaiva survgni il permiss in december dal 2012, cun üna dürada (seg. ledscha da fabrica) d'ün on. Causa chi's tratta d'ün fabricat da seguondas abitaziuns decid'il cussagl da restar vi da sia decisiun, chi d'eira gnüda comunicada i'l mais october a mincha patrun da fabrica tangà.

718 021 FABRICA
Società d'eredis Josef Rütthard; chasa nouva cun plüssas abitaziuns

Il patrun da fabrica dumonda per pudair cumanzar plü tard cul fabricat. Sco motiv pel retard resp. pel fat cha d'ürant tuot l'on 2013 nu saja gnü fat inguotta vain manzunà trattativas culla società d'eredis e'l decess da sia sour (sco conproprietaria). Il cussagl discuta la problematica in möd vast trond eir in consideraziun la charta da l'october 2013 cha mincha patrun da fabrica vaiva survgni. El riva a la conclusiun, chi'd exist'amo la pussibilità da realisaziun però suot seguaintas cundiziuns chi han da gnir resguardadas strictamaing:

- a) I ston esser regladas las pretaisas tenor permiss da fabrica (proprietà etc.) avant sco cumanzar cun qualsia lavuors.
- b) Id ha in mincha cas da gnir evità chi dett'ün'acziun dad alibi.
- c) Per pudair proseguir culla fabrica han da gnir accumulits divers puncts da detagl, ils quals il patrun da fabrica ha d'accumplir.

719 390 BASELGIA
Incumbenza da caluoster; quadern da lavuors ed annunzchas

Il quadern da dovairs ais uossa gnü repassà ün'ulteriura jada da nos manader tecnic culla corp. Evangelica. Il cussagl til vaiva consultà e til fa bun sco preschantà. Quel vain uossa suottamiss als interessents pell'incumbenza per tour posiziun. Davopro inchaminarà il cussagl lura vi da la tscherna.

721 620.311 Signalisaziun da vias e piazzas
Art Engiadina / Archs da bivgnaint al principi dal cumün

Cun charta da l'october 2013 muossan via ils respunsabels, W. Bosshard e D. Cotti, sül fat, cha dal 2007 vaiv'il cumün incumbenzà a D. Cotti da s-chaffir duos archs da bivgnaint. Quels

sun para eir gnü realisats e sun daspö là depositats giò Parnarsura. Uossa prevezzan ils surmanzunats da montar quels archs al principi da la via da sculpturas a Sur En. La fundamainta, il sochel e la montascha surpigliess l'Art Engiadina.

Il cussagl discuta la fatschenda e riv'a la conclusiun, chi ston sco prüm uossa gnir sclerits divers puncts:

Il schef da fabrica, D. Jann ed il manader tecnic, Chr. Poo, s'occupan da la fatschenda.

722 30

PROMOZIUN DA CULTURA

Angelica Overath; volüm da poesias „Poesias dals prüms plets“ dumonda per ün sustegn finanziel vi dals cuosts da produziun

Il cussagl examinescha la dumonda e la documainta inoltrada. El riva però a la conclusiun, ch'adonta chi's tratta qua d'üna buna ed instructiv'ouvra culturala ch'el stima zuond, nu po gnir entrà sülla dumonda, causa cha quella s'inclegia sün basa privata.

723

DIVERSAS SCHEFS

Sistem d'alarmaziun pella protecziun da l'hotel Val Sinestra

Il Capo, Albert Mayer, suottametta la fatschenda ed orientescha lasupra. Davart dal servezzan forestal dal Grischun meridional vain cusglià da far quell'investiziun. I's tratta da realisar ün sistem da survaglianza, ca. 650 m sü per la Val Ruinas, chi observescha cur chi van giò lavinas. In tals cas va our'ün alarm chi müda duos glüms da signal, sur e suot la storta periclitada sün cotschen in möd ch'ingün nu's rechatta lura i'l perimeter privlus. Per examinar però in detagl las pussibilitats d'üna realisaziun d'ün simil sistem resp. indriz bsogna quai d'ün pitschen proget pella planisaziun, il qual gniss realisà da la ditta AlpuG, Tavo. La somma s'amunta ca. tanter fr. 3'000.00 e fr. 4'000.00.

Il cussagl ais da l'avis, cha quella'ouvra saja necessaria e cha quai fa sen. El decid'uschè da tilla realisar in concedond il credit necessari manzunà.

Grotta da cultura / fittanza da las localitats dal turissem Sent a Schigliana

Davart dals respunsabels da la Grotta da cultura vain infuormà, cha'l contrat da fittanza cul turissem da Sent ais gnü firmà. La contribuziun annuala dal cumün a favur da la grotta da cultura s'amunta a fr. 5'000.00 e cuverna exact il fit pellas novas localitats. Uossa dumondan ils respunsabels pel augmaint da quella da fr. 5'000.00 sün fr. 6'000.00. In quel möd füss cuverna il fit annual pellas localitats ed ils cuosts chi stan in connex cull'utilisaziun dal tablà da la fam. Widmer-Zulauf per arrandschamaints plü gronds. Il cussagl stima l'ingaschamaint cultural da la grotta da cultura e decida d'augmantar la contribuziun annuala per fr. 1'000.00.

Kino – Open Air a Sent

Cuntschaintamaing ha Andri Gritti e sia duonna Gianna Bettina decis da schmetter cull'organisaziun da quell'occurrentza chi ha lö minch'on a Plaz. Il Capo, Albert Mayer e la cusgliera, Marianne Werro han gnü ün aboccamaint cun Andri Linsel, chi füss pront cun sia duonna Maria Cristina da cuntinuar cun quella lezcha. Els tscherchan però ün partenari, voul dir els intenziuneschan ev. da fundar üna società per quai. A. Linsel ha suottamiss la dumonda, scha'l cumün plazzess, in möd gratuit, ün appell resp. avis in fatschenda i'l prossem Mas-chalch. Il cussagl salüda l'iniziativa ed ais satisfat dal fat, chi dett'üna cuntinuaziun da quell'ouvra e decid'uschè d'acconsentir quella dumonda.

Ad Andri ed a Gianna Bettina Gritti sco eir ad Andri Linsel ed a Maria Cristina Gregori Linsel pertocc'ün cordial e resenti ingrazchamaint per lur grond e fidel ingaschamaint a bön da la cultura da nos cumün.

724

ORIENTAZIUNS

Ospidal Engiadina Bassa / avertüra dal nouv tract d'operaziun

Quel invida sün sonda, als 16 da november 2013 da las 11.00h – 18.00h.

Mansteranza / register da las dittas d'Engiadina Bassa

La ditta C&B Management GmbH, Cuoira ais vi dal lantschar l'ediziun d'ün register d'infuormaziun sur da dittas, cumüns e societats d'Engiadina Bassa incl. Samignun. Quella suottamett'als cumüns la dumonda per üna conferma da partenari, vuol dir cha'l cumün nun ha da surtour ingüns cuosts, el ha unicamaing da's obliar da concepir minchatant ün text sur dal cumün, da conceder ev. il dret d'utilisaziun da fotografias e da metter sü pro'l fanestrigl da l'administraziun cumünala las broschüras dal register.

Davart da l'uniun da mansteranza d'Engiadina Bassa (pres. Claudio Andry) ais gnü intervenà cul giavüsch, cha'ls cumüns nu dessan dar giò quella decleranza in scrit. Il problem ais, cha divers mansterans, chi s'han fingià partecipà al register – broschüra dal cumün da Scuol e pajan là fingià lur taxas d'inserat gnissan confruntats cun quista soluziun da pajar amo üna vouta la taxa, chi füss però considerabelmaing plü ota.

Il cussagl decida da na firmar la charta da partenadi. La ditta manzunada dess trattar culs mansterans in möd individual.

725

VARIA

Suot varia fix'il cussagl divers termins per sezzüdas.

Il termin pella radunanza cumünala vain fixà, in möd approximativ, sün marcurdi, als 11 december 2013.

La trattativa 720 nu vain publichada, causa cha tala suottastà al secret d'uffizi.

L'actuar:
Marco Fallet

Il Capo:
Albert Mayer